

07 OCT 2003

HAMPIR 4,000 KUNJUNGI PAMERAN SERIBU WAJAH DR MAHATHIR

KUALA LUMPUR, 7 Okt (Bernama) -- Hampir 4,000 orang mengunjungi pameran foto eksklusif Seribu Wajah Dr Mahathir di Balai Seni Lukis Negara di Jalan Tun Razak di sini.

Pameran selama dua bulan bermula semalam memaparkan lebih 500 keping foto cetakan kanvas dan 500 keping lagi berbentuk multimedia serta kolaj.

Kesemua foto ini dirakamkan jurugambar media tempatan termasuk Bernama, New Straits Times, Utusan Melayu, The Star, Sin Chew Daily, Nanyang Siang Pau, The Sun, China Press, TV3 dan NTV7 serta dari Kementerian Penerangan selaku penganjur.

Foto-foto kenangan itu menggambarkan penglibatan 22 tahun Perdana Menteri Datuk Seri Dr Mahathir Mohamad menerajui pentadbiran negara.

Sebilangan besar pengunjung melahirkan rasa puas hati terhadap pameran itu memandangkan ia memaparkan penglibatan agak terperinci Perdana Menteri dalam pentadbiran negara dari peringkat awal hingga ke hari ini.

"Saya amat tertarik melihat potret Yang Amat Berhormat sebagai seorang pejuang yang telah banyak berbakti kepada negara, saya rasa ini cukup menarik dan orang ramai rugi kalau tidak dapat melawat pameran ini," kata Ketua Umno bahagian Sandakan Datuk Seri Haji Ampang Haji Poyon.

Dari raut wajah para pengunjung, jelas terpancar perasaan sedih dan terharu mereka memandangkan jasa Dr Mahathir kepada negara begitu bermakna kepada pembangunan dan kemajuan negara.

Ramai berpendapat pameran ini telah mewujudkan satu keakraban antara pemimpin dengan rakyat.

-- BERNAMA

NLM JM ROS